

## Sahabat Dari Sudut Pemikiran Syiah dan Kritikannya Menurut Ihsan Ilahi Zahir

### (Sahabah [The Companions] from Shi'ite's Perspectives and Critics of Ihsan)

Mohd Fuad bin Mokhtar (Corresponding author)  
Jabatan Usuluddin, Fakulti Pengajian Islam,  
Universiti Sultan Azlan Shah,  
Bukit Chandan, 33000 Kuala Kangsar  
Perak. Malaysia  
Tel: +6016568237 Email: Fuad@usas.edu.my

Mohd Fakhrudin bin Abd Mukti  
Kolej Universiti Insaniyyah, 09300 Kuala Ketil.  
Kedah. Malaysia.  
Tel: +60115744274 Email: rektor@insaniah.edu.my

Azmil bin Zainal Abidin  
Jabatan Akidah dan Pemikiran Islam  
Akademi Pengajian Islam Universiti Malaya  
50603 Kuala Lumpur. Malaysia.  
Tel: +60147263129 Email: hadiqah.irfan@um.edu.my

#### Abstract

Ihsan Ilahi Zahir bin Zuhur Ilahi Ahmad al-Dīn bin Nadham was a Salafi scholar and a pioneer of a movement that preventing deviant teachings and superstitious in religion. He was also a master in almost all branches of Islamic knowledge including *tafsir*, *hadith*, *fiqh*, *aqidah*; as well as Arabic language which he mastered excellently. Most importantly, he is known through his commitments in the field of *da'wah* and his role in defending the true teaching of Islam from the fabrication of other teachings like the *Qadiani*, *Baha'iyyah*, *Babiyyah*, *Isma'iliyyah* and *Shi'i*. His efforts in defending Islam by the means of writings, sermons, seminars and other means had a big impact on Muslim sects especially the *Syi'i*. This paper is meant to discuss and analyse one of the controversial topics under the light of *Shi'i*'s deviant understanding of the *sahabah* (companions). It will analyse two main topics which are the concepts of *sahabah* (companion) from *Shi'i*'s perspective, and Ihsan Ilahi Zahir's critics regarding the concept.

**Keywords :** Ihsan Ilahi Zahir, critics, *sahabah*, *syi'i*

#### Abstrak

Ihsan Ilahi Zahir bin Zuhur Ilahi Ahmad al-Dīn bin Nadham merupakan seorang tokoh dan sarjana Islam beraliran salafi yang mempelopori gerakan dakwah membenteng amalan khurafat dan ajaran sesat. Beliau merupakan seorang cendikiawan yang menguasai pelbagai disiplin ilmu Islam seperti *tafsir*, *hadis*, *feqah*, *akidah* dan sebagainya disamping memiliki kemampuan berbahasa Arab yang baik. Beliau juga seorang ilmuwan dan pendakwah yang tegas dalam menangani isu penyelewengan akidah yang dibawa oleh aliran-aliran yang menyeleweng seperti *Qadiani*, *Baha'iyyah*, *Babiyyah*, *Isma'iliyyah* dan *Syiah*.

Kesungguhan beliau mempertahankan kesucian agama Islam khususnya daripada ancaman Syiah, melalui karya-karyanya, pidato, khutbah, seminar dan sebagainya memberi tumparan hebat kepada Syiah di dunia Islam. Memandangkan kepentingan tajuk sahabat menurut Syiah yang telah dimanipulasikan oleh mereka hingga mengubah kerangka Islam penting, maka artikel ini dilihat akan memberikan wacana dan perbahasan menarik lagi ilmiah. Dalam menganalisis tajuk ini, dua perkara besar menjadi keutamaan iaitu konsep sahabat menurut Syiah dan kritikan Ihsan Ilahi Zahir berkenaan isu sahabat.

**Kata kunci :** Ihsan Ilahi Zahir, kritikan, sahabat, Syiah

## Pengenalan

Topik perbahasan berkenaan sahabat menurut Syiah merupakan perbincangan penting yang perlu diambil perhatian rentetan dari fahamannya yang berbeza dengan faham Ahli sunnah wa al-Jama'ah. Doktrinnya yang diimani oleh mereka telah memberi implikasi besar dengan berubahnya kerangka Islam yang sebenar dalam pelbagai aspek samada akidah, feqah dan akhlak hingga menimbulkan kekeliruan dalam masyarakat. Justeru itu, kefahaman yang jelas berkenaan faham sahabat dan doktrinnya dalam syiah wajar diketahui dan diperhalusi agar Islam yang diterima melalui wasilah sahabat adalah benar dan tidak bercampur dengan faham songsang yang bercanggah dengan Islam. Dalam artikel ini penulis akan cuba memperincikan konsep sahabat menurut syiah dengan berdasarkan karya-karya utama firqah syiah dan seterusnya menganalisis kritikan Ihsan Ilahi Zahir berkaitan isu tersebut.

## Metodologi

Penulis menggunakan metodologi kualitatif bagi mengkaji kritikan Ihsan Ilahi Zahir. Secara umumnya, kritikan Ihsan Ilahi Zahir ini dinilai dan dianalisa melalui buku dan karya-karya samada yang dihasilkan oleh beliau sendiri atau penulis lain. Penulis juga merujuk penulisan lepas yang mengkaji kritikan beliau dalam semua permasalahan akidah dan doktrin Syiah. Artikel ini secara ringkas menggunakan analisis diskusi dalam menganalisa dan mengkaji kritikan Ihsan Ilahi Zahir dalam permasalahan akidah. Dengan ini penulis berkeyakinan bahawa dapatan dan analisa dalam penulisan ini boleh dijadikan sebagai salah satu sumbangan akademik dalam menilai pemikiran akidah ajaran Syiah.

## Latarbelakang Kehidupan Ihsan Ilahi Zahir

Sebelum membincangkan tajuk ini, adalah penting untuk penulis mengetahui dan menelusuri latarbelakang kehidupan beliau bagi melihat dan memperkenalkan ketokohnanya mengkritik akidah tersebut.

## Keluarga dan pendidikan

Nama sebenar beliau ialah Ihsan Ilahi Zahir bin Zuhur Ilahi Ahmad al-Din bin Nadham. Beliau dilahirkan pada 31 Mei 1945 di Sialkot,(Ihsan.2000) Punjab Pakistan dari keluarga berketurunan Seethe. Bapanya bernama Zuhur Ilahi Ahmad al-Din bin Nadham seorang peniaga pakaian yang terkenal dengan sifat amanah dan berpegang dengan faham aliran salafi.(Ihsan.2000). Beliau merupakan seorang yang mementingkan ilmu pengetahuan dan dakwah. Beliau sering mendengar ceramah dari ulama-ulama terkenal seperti Muḥammad Ibrāhīm Meer. Ibu beliau seorang yang kuat berpegang dengan faham aliran salafi walaupun tidak mempunyai pendidikan formal.(Ihsan.2000)

Ihsan Ilahi Zahir merupakan seorang ilmuwan dan pendakwah yang tegas dalam menangani isu penyelewengan akidah. Kesungguhan beliau mempertahankan kesucian agama Islam khususnya daripada ancaman Syiah, melalui karya-karyanya, pidato, khutbah, seminar dan sebagainya memberi tamparan hebat terhadap Syiah di dunia Islam. Berbagai percubaan untuk membunuh beliau telah dilakukan oleh pelbagai pihak yang akhirnya membawa kepada terbunuhnya beliau pada 20 Mac 1987.(Ihsan.2000)

Ihsan Ilahi Zahir dalam dakwahnya mengkritik faham ajaran Syiah banyak membentangkan kertas kerja di seminar-seminar, berkhutbah di masjid-masjid, berceramah dan berdialog dengan ulama-ulama samada dari kalangan Ahl Sunnah wa al-Jama'ah atau firqah lainnya. Menurut satu catatan beliau pernah berdialog berkenaan isu pertembungan fiqh antara fiqh Mazhab Hanafi dan Mazhab Ja'fari dengan pendokong fiqh Ja'fari. Dalam dialog tersebut beliau dilaporkan telah memperlihatkan kehebatannya berhujah dengan penuh kebijaksanaan. Beliau berpendapat bahawa fiqh Mazhab Ja'fari tidak menepati kehendak al-Quran dan al-Hadith Rasullullah SAW dan ini merupakan dialog terakhir beliau sebelum mati dibunuh.

### Kecemerlangan dan Bakat

Ihsan Ilahi Zahir mendapat pendidikan awal ketika beliau berumur 4 tahun di *Madrasah al-Sha'biiyah* Sialkot Punjab Pakistan. Beliau juga dihantar untuk mengaji di Masjid Banadi Sialkot dan ketika berumur 9 tahun beliau mampu menghafal al-Qur'an.

Pendidikan peringkat tinggi bermula ketika beliau menuntut di Universiti Islam Gujranwala, 40 batu dari Sialkot selama 8 tahun. Setelah menamatkan pengajian di Universiti Islam Gujranwala, beliau meneruskan pengajian di Universiti Salafi di Faisalabad, Pakistan sebelum menjakkan kaki di Universiti Islam Madinah, Arab Saudi pada tahun 1963.(Ihsan.2008).

Kesungguhan dan kecekalan hatinya dalam menuntut ilmu membawakan hasil yang baik hingga akhirnya beliau berjaya menamatkan pengajian di universiti tersebut dengan pangkat Mumtaz Kelas Pertama (*Mumtaz Syaraf Awal*). Beliau juga memiliki Ijazah sarjana MA dalam pelbagai bidang seperti Sarjana MA dalam bidang bahasa Arab, bahasa Parsi, Sarjana MA bahasa Urdu, bahasa Inggeris, Falsafah, Syariah Islamiyyah dan Sains Sosial. Kesemua Ijazah Sarjana tersebut diperolehi sewaktu beliau menuntut di Universiti Punjab Pakistan. Kesungguhan beliau dalam menuntut ilmu diteruskan hingga beliau berpeluang menyambung pengajian di peringkat Doktor Falsafah di Universiti Punjab dan diselia oleh Sheikh Siddiq Khan Qannawji. Walau bagaimanapun tesis beliau tidak dapat diselesaikan ekoran percanggahan pendapat beliau dengan penyelia dan Universiti .(Ihsan.2008).

### Karya-karya Ihsān Ilāhī Zāhir

Ihsan Ilahi Zahir seorang tokoh yang tidak asing lagi dalam dunia dakwah khususnya dalam mempertahankan kesucian akidah Islam. Dunia penulisan tidak asing lagi bagi beliau yang mampu menguasai pelbagai bahasa. Beliau telah banyak menghasilkan pelbagai karya berkenaan dengan *firaq* Islam. Antara karya-karya utama beliau yang masyhur dalam pelbagai bidang ialah *Al-Qadianiyyah*, *Al-Shi'ah wa al-Sunnah*, *Al-Shi'ah wa Ahl al-Bayt*, *Al-Shi'ah wa al-Qur'ān*, *Al-Shi'ah wa al-Tashaiyyu'*, *Al-Radd al-Kaft 'ala Mughalaqt al-Duktur 'Alī 'Abd Wāḥid Wāfi* *Kitabih bayna al-Shi'ah wa ahl al-*

*Sunnah, Al-Barilawiyah ‘Aqa’id wa Tarikh, Al-Isma’iliyyah Tarikh wa ‘Aqa’id , Al-Babiyah ‘Ard wa Naqd, Al-Bahaiyyah Naqd wa Tahlil, Al-Tasawwuf al-Mansya’ wa al-Masadir, Dirasat fi al-Tasawwuf.* Karya-karya yang dihasilkan oleh beliau memperlihatkan ketokohnanya bagi menyanggah pemikiran akidah Syiah yang menyeleweng.

## Hasil dan Perbincangan

### Konsep Sahabat menurut Syiah

Persoalan sahabat merupakan perbahasan yang penting dalam ajaran Syiah. Ia dilihat telah melakari kemunculan sebahagian besar doktrin dan akidah lain dalam Syiah. Mereka mendakwa mempunyai pandangan yang sederhana berkenaan sahabat, tidak melampau sebagaimana yang dilakukan oleh pelampau-pelampau yang mengkafirkan semua sahabat sebagaimana dakwaan mereka. Begitu juga tidak melampaui jumhur yang mempercayai semua sahabat adalah adil secara mutlak. Menurut Asad Haidar, para sahabat mempunyai kelebihan tetapi mereka bukannya maksum seperti nabi dan rasul. Mereka seperti orang lain ada yang adil, ada yang tidak adil, ada yang fasiq dan ada yang melakukan maksiat kerana mereka dinilai berdasarkan perbuatan mereka (Haydar, 1987). Oleh itu yang baik akan diberikan ganjaran kerana kebaikan mereka dan yang jahat akan dibalas kerana kejahatan mereka.

Beliau juga menegaskan, para sahabat termasuk orang munafik, orang yang melakukan fitnah dan orang yang menukar perkara-perkara tentu berkenaan Rasulullah SAW. Mereka melakukan penipuan sehingga datangnya kebenaran (Haydar, 1987). Oleh itu sahabat bagi Syiah tidak maksum samada pada hayat Nabi SAW atau selepasnya. Walau bagaimanapun Syiah menghormati dan menyanjungi para sahabat yang diuji dengan ujian yang pelbagai di dalam membantu agama Islam dan berjuang jiwa dan raga dan harta benda mereka.

Perbahasan berkenaan sahabat ada kaitannya dengan *Ahl al-Bayt* dimana dikalangan para sahabat adalah *Ahl al-Bayt*. Justeru itu menurut Muḥammad Rida al-Muzaffar, Syiah merupakan firqah yang mendukung kuat *Ahl al-Bayt* (keluarga) Nabi SAW, mereka mencintai *Ahl al-Bayt*, mazhab dan pegangan mereka berdasarkan perkataan dan perbuatan *Ahl al-Bayt*, dan mereka meneladani *Ahl al-Bayt* dan berjuang kerananya. Bagi Syiah, *Ahl al-Bayt* hanya dibatasi kepada empat orang sahaja iaitu ‘Alī dan isterinya Fātimah serta anaknya Ḥasan dan Ḥusayn dan keturunan dari zuriat mereka sahaja. Mereka telah menyisihkan anak-anak ‘Alī selain dari Ḥasan dan Ḥusayn daripada *Ahl al-Bayt* seperti Muḥammad Ibn al-Ḥanafiah. Begitu juga Abū Bakar, ‘Umar, ‘Uthman bin ‘Affan, ‘Abbas, Ja‘far, ‘Abd Allāh, ‘Ubayd Allāh dan Yahyā. Bahkan mereka mengeluarkan anak kandung Rasulullah sendiri iaitu Zainab dan Ummu Kalthum serta anak-anak mereka daripada dikatagorikan sebagai *Ahl al-Bayt*. Bahkan anak Ḥasan bin ‘Alī sendiri tidak mereka masukkan sebagai *Ahl al-Bayt* kerana mereka tidak disenangi (Ihsan, 1982).

Sikap pilih kasih Syiah dalam mengkatagorikan kelompok *Ahl al-Bayt* menimbulkan beberapa persepsi buruk mereka kepada para sahabat dan kritikan yang melampau. Mereka menuduh para sahabat besar seperti Abu Bakar, ‘Umar, ‘Uthman dan sahabat lainnya dengan pelbagai tuduhan termasuk Aisyah isteri baginda Rasulullah SAW.(Al-Tunsawi, 1983) Muḥammad al-Baqīr al-Majlīsī menyatakan

Sesungguhnya kita berkecuali daripada berhala yang empat iaitu Abu Bakar, ‘Umar, Uthman, Mu‘wiyah dan perempuan yang empat iaitu ‘Aishah, Ḥafsah, Hindun, ‘Umm al-

Hakam dan semua pengikut-pengikutnya, mereka semua adalah sejaht-jahat makhluk Allah di atas muka bumi, tidak akan sempurna keimanan kepada Allah, Rasulnya dan para imam kecuali selepas berlepas diri daripada musuh-musuh mereka.

Menurut Muḥammad al-Tijani al-Samawi, Syiah menghina para sahabat dan menganggapnya sebagai manusia yang paling buruk akhlaknya, hina keterunannya, perampas kuasa, gilakan dunia dan sebagainya.(Al-Samawi, 1985 ) Ia turut diperakui oleh al-Khomaini (Al-Khomeini,1984) dan al-Kulayni (Al-Kulayni,1980) dan juga ulama-ulama lain. Banyak riwayat-riwayat yang ditulis oleh ulama' mereka mengkafirkan sahabat, memurtadkan, melaknat, memaki hamun, menghina dan melakukan *tabarra'* iaitu memutuskan hubungan kasih sayang dengan para sahabat. Mencela, melaknat dan mengkafirkan para sahabat Muhammad SAW adalah ibadah yang sangat mulia disisi Syiah. Mereka menuduh dengan pelbagai tuduhan yang tidak berasas dan ia jelas dimuatkan dalam kitab-kitab mereka seperti Abī Ḥasan ‘Alī bin Ibrāhīm al-Qummī dalam kitabnya *Tafsīr al-Qummī*, Abī Manṣūr Aḥmad bin ‘Ali bin Abi T’Alīb dalam kitabnya *al-Iḥtijāj*, Muhammad Baqir al-Majlisi dalam kitabnya *Hayah al-Qulub*, Abi Ja‘far Muḥammad bin ‘Ali bin Ḫusayn Babawayh al-Qummī dalam kitabnya *Kitab al-Hisal*, Neamatullah al-Musawi al-Jazairi dalam kitabnya *al-Anwar al-Nu’māniyyah* dan sebagainya.

Sebenarnya, banyak hadith-hadith Syiah yang menghina para sahabat nabi sebagaimana di atas termasuklah ‘Ali bin Abi Talib yang diagungkan oleh mereka. Begitu juga penghinaan mereka terhadap Fāṭimah binti Muḥammad, isteri Saidina ‘Ali bin Abu Talib, penghinaan terhadap Ḥasan bin ‘Ali, Ḥusin bin ‘Ali bahkan penghinaan terhadap *Ahl al-Bayt* Rasulullah dan juga putera-puteri nabi.(Ne’amatullah,2008).Mereka mendakwa seolah-olah mereka adalah dari kalangan *Ahl al-Bayt* atau yang menyanjung tinggi *Ahl al-Bayt* tetapi sebenarnya mereka mempunyai persepsi yang tidak baik terhadap sahabat sebagaimana yang dinyatakan dalam kitab-kitab mereka.

Pemikiran ini ditimbulkan dalam ajaran Syiah oleh ‘Abd Allah bin Saba’ *al-Yahudi al-Khabith* dengan tujuan untuk memporak perandakan Islam, menyelewengkannya dan memasukkan ajaran lain ke dalam agama Islam. ‘Abd Allāh bin Sabā’ telah memperkenalkan pelbagai ajaran baru dalam Islam dengan menjadikan ‘Ali bin Abi Talib sebagai pemimpin yang sah dan memperlihatkan rasa kasih dan setia terhadapnya. Begitu juga mereka cuba menghasut orang Islam agar memusuhi sahabat lain seperti Abū Bakar, ‘Umar, ‘Uthman dan lainnya (al-Tusi, tt). Ia turut diperakui oleh al-Kashi seorang tokoh besar dalam *firqah* Syiah. Menurut beliau, sesungguhnya umat telah menzalimi ‘Ali, telah merampas haknya, iaitu hak khilafah dan wilayah, Maka wajiblah ke atas seluruh umat kini membantu dan menolongnya. Seterusnya hendaklah mereka menarik balik bai’ah dan ketaatan mereka kepada Usman.

Hakikatnya Saidina ‘Alī tidak pernah memperkenalkan akidah memuja beliau dan meninggikannya, begitu juga akidah mengkafirkan dan menghina para sahabat. Beliau berkecuali dari semua dakwaan tersebut yang disandarkan kepada beliau oleh Syiah. Ia sengaja diada-adakan bagi tujuan menghina bahkan mengkafirkan para sahabat.

Syiah juga berpandangan Abu Bakar telah merampas jawatan khalifah daripada Saidina ‘Ali selepas kewafatan baginda Rasulullah SAW. Dalam peristiwa perlantikan Saidina Abu Bakar sebagai khalifah di Balai Bani Saqifah, para sahabat termasuk keluarga Rasulullah berbaiah dengan Abu Bakar sebagai khalifah yang pertama sedangkan sebenarnya mereka inginkan dari kalangan *Ahl al-Bayt* mereka sendiri. Mereka telah mencalonkan al-Abbas

bapa saudara nabi dari Bani Hasyim sebagai khalifah, tetapi akhirnya Abū Bakar dari golongan muhajirin terlantik sebagai khalifah yang pertama (Ihsan, 1987). Perlantikan Abu Bakar sebagai khalifah dikatakan telah merampas jawatan tersebut dari Saidina ‘Ali. Selepas kewafatan Abu Bakar, ‘Umar al-Khattab dilantik sebagai khalifah menggantikan Abu Bakar (Ibn ‘Athir, 1995). Umar kelihatan lebih agresif dengan meluaskan pengaruh Islam dan melaksanakan dasar yang tidak dapat disempurnakan oleh Abu Bakar. Islam semakin terserlah dan digeruni oleh negara-negara asing dan menempa nama baik ketika itu. Selepas Khalifah ‘Umar mati terbunuh, ‘Uthman bin ‘Affan pula dilantik sebagai khalifah. Pada zaman inilah, fitnah menular dan api permusuhan semakin menjadi. Beberapa gerakan wujud dengan tujuan untuk menimbulkan kacau bilau seperti gerakan Syiah.

Menurut Muḥammad al-Tijani al-Samawi, Syiah mengkafirkan para sahabat disebabkan mereka menolak ajaran yang dipegang oleh Syiah yang dikatakan berasaskan kepada al-Sunnah sebagaimana dakwaan mereka. Mereka juga menolak al-Qur'an kerana ia disusun oleh para sahabat yang murtad disamping menolak hadith nabi kerana diriwayatkan oleh para sahabat yang murtad. Bahkan mereka menuduh Allah SWT tidak bijak kerana memilih para sahabat semuanya murtad kecuali beberapa orang sahabat sahaja yang tidak murtad. Justeru itu mereka menolak para sahabat besar bahkan mengkafirkan mereka. Ini jelas bercanggah dengan ajaran Islam yang memerintahkan hambanya untuk mencintai para sahabat dan menjadikan mereka sebagai contoh tauladan.

Sejarah menyaksikan khalifah-khalifah yang terlantik bukan dari kalangan *Ahl al-Bayt* sedangkan mereka berharap agar ianya dari kalangan mereka. Rentetan dari itu telah menimbulkan beberapa peristiwa tidak baik sepanjang mereka menjadi khalifah bagi menggambarkan perasaan tidak puas hati terhadap ketiga-tiga khalifah tersebut. Walau bagaimanapun Saidina ‘Ali akhirnya terlantik sebagai khalifah keempat setelah didesak oleh para sahabat bagi mengurangkan keadaan tegang yang berlaku ketika itu. Di zaman pemerintahan Saidina ‘Ali sebagai khalifah, telah berlaku perperangan Jamal dan Ṣiffin. Ia adalah menefestasi tersurat kesan daripada kekecewaan memuncak sesama mereka. Perperangan Siffin berkesudahan dengan termeterainya Perjanjian Tahkim. Dalam perjanjian tersebut Saidina ‘Ali didakwa teraniaya dengan perjanjian berat sebelah, ditipu oleh Mu'awiyah hingga akhirnya memaksa beliau menyerahkan jawatan khalifah kepada Mu'awiyah bin Abi Sufian. Beliau telah melantik anaknya Yazid sebagai putera Mahkota dan ianya dianggap melanggar perjanjian. Suasana tidak harmoni ini akhirnya mengundang persepsi tidak baik firqah Syiah mendakwa kononnya mereka telah dizalimi dan menuntut jawatan tersebut dikembalikan kepada mereka. Oleh kerana itulah mereka mula mencipta beberapa doktrin akidah seperti *al-Wilayah wa al-Imamah*, *al-Raj'ah*, *al-Mahdi* dan sebagainya bagi mengembalikan jawatan khalifah kepada mereka. Justeru itu, mereka menjadikannya sebagai usul akidah penting dalam ajaran Syiah yang perlu diperjuangkan hingga akhirnya matlamat mengembalikan jawatan khalifah atau Imamah kepada mereka tercapai.

## Kritikan Ihsan Ilahi Zahir terhadap persoalan Sahabat

Persoalan sahabat dibincangkan oleh Ihsan Ilahi Zahir dalam dua karya utama beliau iaitu *al-Shi'ah wa al-Sunnah* dan *al-Shi'ah wa Ahl al-Bayt*. Persoalan tersebut dibahas dan dikritik oleh beliau rentetan kecaman, tohmahan dan pandangan serong Syiah terhadap para

sahabat yang telah berjasa besar menyebarkan agama Islam ke pelusuk dunia. Menurut Ihsan Ilahi Zahir, ia berpunca dari fitnah yang dilakukan oleh ‘Abd Allāh bin Sabā’ yang meniup dan menyebarkan fitnah berkenaan para sahabat (Ihsan, 1974) hingga kredibiliti mereka sebagai generasi terawal menerima sumber hukum melalui baginda Rasulullah SAW dipertikaikan. Ia akhirnya akan membawa kepada mempersoal dan mempertikaikan apa sahaja yang dibawa dan diriwayatkan oleh para sahabat sekaligus menolak sumber hukum utama iaitu al-Qur'an dan al-Sunnah. Bagi memperkuatkan dakwaan tersebut beliau telah mengemukakan pandangan al-Nubakhti bahawa ‘Abd Allāh bin Sabā’ adalah orang yang terawal menyebarkan fitnah mencaci maki Abū Bakar bapa mertua Rasulullah SAW, Umar dan menantu baginda ‘Uthman hingga ia dijadikan doktrin kepercayaan dalam akidah Syiah membenci tiga orang sahabat tersebut, sedangkan Rasulullah sendiri tidak pernah membenci mereka. Penghinaan mereka kepada Abu Bakar juga diperkuatkan oleh Ihsan Ilahi Zahir dengan mengemukakan kenyataan al-Kashi seorang tokoh Syiah dalam ilmu *al-Jarḥ wa al-Ta'dil* dengan katanya.(Ihsan, 1975).

Muhammad Ibn Abū Bakar ada menyebutkan kepada kami di sisi Abu Abdillah. Kata Abu Abdillah: “Rahmat dan kesejahteraan daripada Allah terhadapnya.” Kata Muḥammad Ibn Abū Bakr kepada Amirul Mukminin Ali pada suatu hari: “Bukalah tangan engkau, aku hendak memberikan bai'ah kepada engkau.” Kata Ali,“ untuk apa engkau lakukan ini?” Jawabnya: “Sesungguhnya aku hendak memberikan bai'ah kepada engkau.” Ali pun menghulurkan tangannya lalu Muhammad pun membai'ahnya: “Aku naik saksi bahwasanya engkaulah Imam yang wajib ditaati. Sesungguhnya bapaku adalah penghunu neraka.

Syiah juga turut mengecam dan mengutuk Khalifah Umar al-Khattab dengan kecaman yang melampau. Bagi memperkuatkan kenyataan tersebut Ihsān Ilahī Zahīr telah mengemukakan kenyataan Ibn Babawaih al-Qummi, Kata Umar ketika hampir mati:  
Aku bertaubat kepada Allah daripada tiga perkara – Aku dan Abū Bakar telah merampas kedudukan khalifah tanpa persetujuan manusia. Aku telah mengangkat Abū Bakar menjadi khalifah dan melebihkan sebahagian muslimin terhadap sebahagian yang lain.

Begitu juga penghinaan kepada ‘Uthman bin ‘Affan menantu Rasulullah dan suami kepada dua orang puteri baginda (Ihsan, 1975). Kata al-Kāshī.

Maka ‘Uthman pun berjumpa Rasulullah SAW lalu katanya: Tidaklah kita masuk Islam dengan tujuan untuk mencela diri dan kehormatan kita. Maka jawab Rasulullah: Apakah kamu suka dikatakan demikian? Maka turunlah dua ayat al-Qur'an yang bermaksud: Mereka mengira dirinya berbudi kepadamu (wahai Muhammad) dengan sebab mereka telah Islam (tidak melawan dan tidak menentang).

Bukan hanya mereka sahaja yang mendapat kutukan Syiah bahkan mereka turut mengutuk keluarga nabi dan juga tokoh-tokoh besar yang sentiasa mendampingi nabi SAW seperti Aisyah isteri baginda Rasulullah. Ihssn Ilahi Zahir menukilkan kenyataan al-Kashi setelah ‘Ali bin Abi Talib berjaya mengalahkan penentang-penentangnya dalam perang Jamāl. Amirul Mukminin telah mengutus ‘Abd Allāh Ibn ‘Abbas kepada Aisyah supaya segera berangkat dan tidak banyak berbicara (Ihsan, 1975).Kata Ibn ‘Abbās,

Engkau hanyalah salah seorang daripada sembilan orang janda yang telah ditinggalkan oleh Rasulullah sesudah kewafatannya. Engkau bukanlah yang paling putih kulitnya di antara mereka, engkau bukanlah yang paling cantik wajahnya di antara mereka, engkau bukanlah

yang paling terpilih di antara mereka dan engkau bukanlah daripada keturunan yang baik.” Kata Ibn ‘Abbas lagi, “Kemudian aku beredar dan menemui Amir al-Mukminin a.s. Aku beritahu kepadanya apa yang dikatakannya dan apa pula jawapanku kepadanya.” Kata ‘Ali, “Aku lebih mengetahui tentang siapa yang aku utuskan engkau.

Ihsan Ilahi Zahir mengemukakan kenyataan di atas berasaskan sumber yang kukuh dari pandangan dan kenyataan ulama mereka yang muktabar. Beliau menelusuri kitab-kitab mereka bagi membuktikan Syiah sebenarnya memusuhi para sahabat.

Ihsan Ilahi Zahir dalam kritikannya menyimpulkan dimana Yahudi telah membentuk suatu kelompok atas nama Islam di bawah pimpinan ‘Abd Allah bin Saba’ dengan menzahirkan keislaman dan menyembunyikan kekafirannya (Ihsan,1975). Mereka sebenarnya ingin menyebarkan akidah dan pemikiran Yahudi di kalangan kaum muslimin dengan mencipta akidah dan kepercayaan yang salah berkenaan sahabat. Mereka juga menyebarkan fitnah di kalangan kaum muslimin dan mengadakan pakatan sulit untuk menjatuhkan khalifah ‘Uthman sehingga suasana kacau bilau berlaku. Mereka berjaya membunuh khalifah ‘Uthman bin ‘Affan dan berpuluhan-puluhan ribu lagi telah terkorban. Menurut Ihsan Ilahi Zahir lagi, mereka cuba mananam perasaan dengki dan dendam kesumat dalam hati manusia supaya membenci Abu Bakar, Umar, ‘Uthman dan para sahabat lain dengan mengkafirkan mereka kecuali beberapa orang sahaja. Ini semua dilakukan oleh mereka dengan tujuan untuk menghilangkan kepercayaan umat Islam kepada para sahabat. Ini kerana para sahabatlah yang telah mendengar al-Qur'an daripada Rasulullah dan melaksanakan perintahnya. Merekalah yang telah melihat Rasulullah menghurai, mentafsir dan menerangkan al-Qur'an itu dengan perkataan dan amalannya. Tetapi Syiah menuduh mereka kafir dan murtad dan menolak apa sahaja yang datang dari mereka. Mereka ingin menimbulkan keraguan di kalangan kaum muslimin agar meragui al-Qur'an yang ada di tangan kaum muslimin dan menolaknya. Mereka menuduh para sahabat telah melakukan pengkhianatan dengan mengubah, menukar dan mengurangkan kandungannya. Al-Qur'an sebenar yang diturunkan kepada Nabi Muhammad kini ada di tangan al-Mahdi al-Muntażar yang diperolehinya dengan jalan wahyu (Ihsan, 1975)

Ihsan Ilahi Zahir telah menolak pandangan tersebut dengan mengemukakan pandangan *Ahl Sunnah wa al-Jama'ah* dengan berasaskan dalil-dalil syara'. Beliau telah mengemukakan pelbagai hadith Rasulullah SAW dengan memuliakan para nabi dan memberi peringatan terhadap sesiapa yang mencela mereka. Dalam satu hadis beliau memperingatkan agar jangan mencela para nabi sebagaimana sabda Rasulullah (Al-Bukhari.2006):

Terjemahan: Janganlah kamu mencela para sahabatku. Kalauolah seseorang kamu menafkahkan emas sebesar Bukit Uhud, nescaya belum sampai secupak atau setengah cupak dari apa yang mereka nafkahkan.

Allah SWT memuji para sahabat dengan beberapa kemuliaan. Rasulullah mendoakan mereka dengan keampunan, memuji dan menyanjung mereka dengan kebaikan. Baginda melarang sesiapa sahaja yang mencerca dan mencaci para sahabat dengan beberapa ancaman. Ihsan Ilahi Zahir dalam kritikannya mempertahankan maruah para sahabat dengan asas yang kukuh. Baginda Rasulullah tidak pernah berbohong dan segala yang disabdakannya adalah wahyu dari Allah dan bukannya berasaskan nafsu baginda. Sehubungan dengan itu, Ihsan Ilahi Zahir dalam kritikannya berjaya mempertahankan maruah para sahabat daripada dimalukan oleh Syiah. Beliau dalam kritikannya juga berjaya membuktikan pendirian sebenar Syiah terhadap para sahabat. Beliau berjaya membongkar

tujuan sebenar Syiah mengadakan pelbagai doktrin akidah dan kepercayaan salah berkenaan sahabat.

## Kesimpulan

Makalah ini secara umumnya membincarkan berkenaan faham sahabat menurut Syiah. Akidah tersebut dilihat sebagai satu akidah yang bercanggah dengan *Ahli Sunnah wa al-Jama'ah* dan penulis telah menganalisis penyelewengannya dengan meninjau pandangan dan kitikan Ihsan Ilahi Zahir seorang pendakwah yang kuat menentang ajaran Syiah. Penulis juga telah memperkuuhkan perbincangan ini dengan mengemukakan pandangan ulama-ulama Syiah disamping ulama *Ahli Sunnah wa al-Jama'ah* bagi memperkuuh dan melengkapkan lagi kajian ini. Penulis menganggap tokoh ini banyak menyumbang kepada dunia Islam tanpa mengenal penat dan lelah bagi memastikan agama Islam terus terpelihara. Akidah dan ajaran berkaitan sahabat menurut syiah dengan jelas mempunyai faham yang berbeza dengan *Ahli Sunnah wa al-Jama'ah*. Justeru itu, kajian ini menunjukkan penyelewengan faham sahabat yang diimani oleh Syiah dengan meninjau fahamnya menuut Syiah dan kritikannya menurut Ihsan Ilahi Zahir.

Justeru itu umat Islam hari ini sewajarnya menyedari bahawa sahabat yang selama ini diagungkan oleh Islam dicerca oleh Syiah. Mereka tidak menyanjung bahkan menuduh dengan pelbagai tuduhan terhadap para sahabat. Menurut *Ahli Sunnah*, mereka adalah kalangan manusia yang dipuji oleh Allah dan Rasulnya rentetan dari sumbangannya yang besar menyebarkan Islam ke segenap pelusuk alam ini. Bahkan dalam beberapa hadis terdapat dikalangan sahabat yang dijanjikan syurga oleh Allah SWT rentetan dari keikhlasan dan pengorbanannya yang besar dalam penyebaran agama Islam. Persepsi negetif Syiah terhadap sahabat seumpama ini wajar di perbetulkan agar masyarakat tidak terpedaya dengan tipu daya mereka.

## Bibliografi

- Al-Khomaini, Ruhullah al-Musawī. (1984). *Tahrir al-Wasilah*. Iran: Dār al-Kutub al-'Ilmiyyah.
- Al-Ṭusi, Abi Jaafar Muḥammad bin al-Hasan al-Tusi.(1969). *Tahdhīb al-Aḥkām*. Tehran: Dar al-Kutub al-Islamiyyah.
- Al-Kulayni, (1992). *Usul al-Kafi*, Beirut : Dar al-Adwa'.
- Al-'Asqalani, Ibn Ḥajar (2000). *Fath al-Bari bi Sharḥ Sahih al-Bukhari*. Riyadh: Maktabah Dar al-Salam.
- Al-Jaza'iri, Sayyid Ne'amatullah.(2008). *Al-Anwar al-Nu'maniyyah*. Beirut: Dar al-Kufah.
- Al-Samawi, Muḥammad al-Tijāni.(t.t). *Al-Shi'ah Hum Ahl al-Sunnah*. London: Muassasah al-Fajr.
- Ibn Athir, 'Izzudin Abi al-Hasan 'Ali bin Abi al-Karam Muhammad bin Muḥammad 'Abd Karīm bin 'Abd al-Wāhid al-Saybānī.(1995). *Al-Kamil fī al-Tarikh*. Beirut: Dar Sadir.
- Ihsan Ilahi Zahir, (1995). *al-Rad 'ala al-Duktur 'Alī 'Abd al-Wahid Waftī Kitabihī Bayna al-Shi'ah wa Ahl al-Bayt*, Lahore : Idarah Turjuman al-Sunnah.

Ihsan Ilahi Zahir, (1995). *Al-Shi'ah wa al-Qur'an*. Pakistan: Idarah Tarjuman al-Sunnah.

Ihsan Ilahi Zahir, (1974). *Al-Shi'ah wa al-Sunnah*. Lahor: Matba'ah Ma'rif.

Ihsan Ilahi Zahir, (2000). *Al-Shi'ah wa al-Tashaiyyu'*. Kaherah: Dar Ibn Hazm.

Ihsan Ilahi Zahir, (1987). *Al-Tasawuf*. Riyad: Bayt al-Salam

Ihsan Ilahi Zahir, (1982). *Al-Shi'ah wa Ahl al-Bayt*. Riyad: Maktabah Jawid.

Ihsan Ilahi Zahir, (1981). *Al-Babiyah*. Lahor: Matba'ah Jawid.

Ihsan Ilahi Zahir, (t.t.). *Al-Rad 'Ala al-Duktur 'Ali 'Abd Wahid Wafi fi Kitabihi Bayna al-Shi'ah wa ahl al-Sunnah*. Lahore: Idarah Turjuman al-Sunnah

Sheikh Asad Haidar, (1987). *Al-Sahabah Menurut perspektif Islam*. Terj. Haji Khalid Kasban, Singapura : Pustaka al-Ikhwan.